

LIGÁRADAN PÁBLO JOUN COLÓSASNA

Labúrjjan Páblo joun tílana ligílisi to Colósasboun

1 ¹Anája áu Páblo, le ában láni Jesucrístu apóstolu láu lugúndan Búngiu. ²Úara lúma Timotéo le wadúje lueígiñe Jesucrístu nabúrjjañoun gárada to jun, jugúya le lánigu Búngiu ja gúnfulibaña lúma Crístu le uágubei jafíñera, ja ubúrugubaña Colósas. Binílaün Wáguchi Búngiu, ibíja jumá gíñe darángilaü lúmagiñe.

Layúmuragun Páblo jawágu affíñetiña lun Búngiu

³Súnwandan weteíngiruni Búngiu, le Lúguchi Wabúreme Jesucrístu, dan le wayúmuragun lun juágu. ⁴Agáambaadiwa luágu jafíñen luágu Crístu Jesús lúma luágu jínsiñejabu joun sun ja lánigubaña Búngiu, ⁵ladúga eménigini le juágubei luágu le areidúañubei jubá siélu. Chülútün ártügüdei eménigini le lárígiñe jagáambuni ugánu le inárütibe, ugánu le luáguti asálbaruni. ⁶Ugánu méme le, lé meja apúrichijóubei jun, labúruchaguña lídan sun uboú, lasáansiraguña jagáburi gürígia ítara quei lasúseredun jídan lúmagiñe jagáambuni ladímurejoún luágu línsiñejabu Búngiu, ába jasúbudiruni luágu inárüti lan insiñejabuni le. ⁷Ligía cátei le larúfudajabei Epáfras jun, le ñadágimeinjalibe wáma. Jínsiñeti woun, subúdi wamúti luágu gayára lán meja wemenigidun luágu lun lesériwiduni Crístu buídu jagánagua wawéñegua. ⁸Barújali ugánu woun juágu lúma luágu jínsiñejabu le rúlaalíbei Búngiu jun. ⁹Ligía lúmagiñe lubei wéyu le wasúbudirunbalin cátei le, merédeti wayúmuragun lun Búngiu juágu, lúma wamúriajan lúma lun lasúbudiragüdüni lugúndan jun buídu, ru ligíame sun luwúyeri subúdi lúma gunfaráandaü jun luágu cátei le larúfudajabei lání Espíritu jun. ¹⁰Ítara lúba gayára lan jagáburidun queísi lúnti lan jagáburidun lánigu Wabúreme, adúgei le áubei lagúndaara súnwandan, arúfudeina ában alúbajani le lánina sun luwúyeri cátei buíti, lun gíñe jasúbudirunitima Búngiu. ¹¹Amúriajatiwa lúma lun léredagüdünün láu luweírin lubáfu lun gayára lan jawánduni sun cátei láu sarágu gurásu lúma ugúndani, ¹²lun gíñe jeteíngiruni Wáguchi Búngiu luágu

aráanse láadiwa lan lun werésibiruni wafánran lídaangiñe le lúnbei líchuguni joun lánigu lídaanme larúeijan le lánina larúgouna. ¹³Séfu lumútiwa Búngiu lídaangiñe lubáfu lubúriga, ába líchuguniwa lídoun larúeijan Liraú le jínsiñebei lun, ¹⁴le asálbarubaliwa láu loúnwen, chibálei wafígoun.

Aráandaruni lúma Búngiu láu loúnwen Crístu

¹⁵Wáguchi Búngiu le siñábei jarjini gürígia, ába liábin uboúagun lídan ában luwúyeri le gayáraati jarjini gürígia lídan Liraú le Jesucrístu, le weírigutimaabei lídaangiñe sun cátei le njeinbei. ¹⁶Lídaangiñe Crístu ladúgei Búngiu sun cátei le siélurugubei lúma le uboúagubei, dándu buri cátei le marijínbei quei le arijúabei. Lídaangiñe Crístu ladúgei arúejani, gumádi, lúrudu buri lúma buri ubáfu le jáni ánjeligu, áni lun gñe Crístu ladügúwa. ¹⁷Lubáragiñebei sun cátei, njeinjali meja Crístu, áni láu lubáfu, njein lubei sun cátei lídan lubára. ¹⁸Loúgiñe sun líra, Crístu jachúgüdinabei lánigu, ja gíribaña lúgubu, ja gñe gíribaña lilgílisin. Ligía le íchugubei ibágari lun úgubu ligía, ligía furúmiñebei ásaara lídaangiñe oúweni lun moúnwendügüyaali lan, lun ligía lan láu furúmiñeti ubáraü lídan sun cátei. ¹⁹Ítara líña labúseeruni Búngiu lun njeinbei lan sun le ligíabei lídan Crístu. ²⁰Lídaangiñe Crístu, ába laráandaragüdüni Búngiu sun uboú dayárugubei lúmagua, dándu buri cátei le uboúagubei quei lé buri siélubei, ladügüni aráandaruni ligía láu loúnwen Crístu luágu gurúwa.

²¹Jugúya, teréncha buri meja jugúya lun Búngiu, lágani buri meja Búngiu jugúya tídan janígi ladúga buri cátei wuríbati le jadügübei. ²²Ánjeinti guetó, aráandaragüda láadün Búngiu lúmagua láu loúnwen Crístu lun larúfudunün jarúmañu, madúrunga, queísi lánigu ligíbugiñe. ²³Ítara méme lúba gñe ánjaün asígira derégüdagü lídan jaffñen, ragúñu buídu luágu Crístu, mígirunga jumeí eménigini le juágubei le íchugubalin ugánu lánina asálbaruni le jagáambubei. Ligía ugánu le apúrichijóubei lídan sun uboú, le gñe napúrichijabei, áu Páblo.

Rúlumuti Búngiu Páblo lun lesériwidun joun tílana buri ligílisi

²⁴Guetó gúndaatina láu le nasúfurirubei juágu, lugúndun láu igáburi le, gayáraati níderagun láu núgubu guánarügü lun loústaragüdúniwa le lúngilíbei lasúfuriruni Crístu jawágu lánigu, jawágu lilgílisin ja lúgubu. ²⁵Núbinjadina lun ábanbadina lan jádaangiñe ja esériwidubaña joun lánigu Crístu luágu wadágimanu le líchugubei Búngiu nun luágu jufúleisein, jugúya le mámabei jurú, lun napúrichijani ugánu le láni Búngiu jun quei lubúdubu. ²⁶Ugánu ligía, cátei lé meja arámudañu lubei Búngiu lúmagiñe sarágu dan, áni guetó subúdigüda láali joun lánigu. ²⁷Joun lánigu Búngiu labúseera lasúbudiragüdüni luweírin irisini le lídaanbei cátei arámudaguati le, le júnbei jugúya le mámabei jurú dándu joun ja jurúbaña. Cátei arámudaguati ligía, luágu njein lan Crístu jídan, jurú yebe, máma yebe jurú, áni ligía le ídaanbei jíchigei jeménigi luágu uweíriguni le lúnbei jibjini siélu.

²⁸Luágu Crístu wapúrichija, aríñagatiwa joun sun gürígia lun járügüdüni lémeri Crístu, arúfudaja wagía luágu, lun gunfaráanda jamá buídu buídu, faráragua jagía buídu lídan ában lúma Crístu. ²⁹Ligía nuwádigimaridunbei, áfaagueina láu sun érei lúma ubáfu le líchugubei Crístu nun.

2 ¹Buséntina lubefti lun jasúbudiruni luágu luweírin lidíjери narítangun juágu, lúma jawágu affíñetiña ja Laodicéabaña, lúma jawágu sun jíbirigu affíñetiña ja maríjin jamáginabaña. ²Weíríti nayúmajan lun gagúraasun jumá tídan janígi, lun lídan jumá ában láu línsiñejabu Crístu juágu joun jíbirigu, lun gunfaráanda jumáni linárün Búngiu buídu buídu lun derégüdagu jumá lídan le uágubei jafíñera, gayára lámuga jasúbudiruni laráansejan Búngiu lé meja arámudaguabei, le luáguti Crístu guánarügü. ³Lídaañein Crístu sun linárün Búngiu lúma ubáfu lun gunfaráanda wamáni sún buri inárüni le, le queísibei ában oúnwenbun irisini woun. ⁴Naríñaguñein buri cátei le jun lun mayéedun lánün ni ában láu buri dimúrei buíduburiti. ⁵Láu sun úa nan jigíbugiñe lun gayára lan jamúga jaríjinina, anájein júma lídan espíritu, áni gúndaatina láu naríjini luágu lídaañein lan dan sun cátei jurúma áni derégüdagu jíña lídan jafíñen luágu Crístu.

⁶Ligía, ítara queísi jerésibiruni Wabúreme Jesucrístu láu sun jafíñen luágu, lúnti ítara lan jabágaridun lídan ában lúma, ⁷lun ragúñu lan jibágari luágu lídan le jídin jubáruaguouün lúma, derégüdagu lídan jafíñen ítara queísi larúfudajoúniwa jun, láu eteíngiruni lun Búngiu súnwanda.

Iséri ibágari lídan Crístu

⁸Toúnigi jumá, mígiraguagüda jumá júngua joun ja busénbaña jayéejan láu buri arúfudajani málati. Máma lúmagiñeti Crístu cátei le jarúfudajabei, lúmagiñeti jagáburi binádu mútu lúma buri ligáburi jarítangun gürígia lánina ubou le luágu cátei.

⁹Níjein sun le Búngiubei lídan Crístu, ¹⁰áni jugúya, buin jíña láu Búngiu lugúndun lídaañadiün ában lúma Crístu. Jéreti Crístu lueí sun lúruđu lúma ubáfu le ubouagubei lúma le siélubei. ¹¹Láu gíñe lídaañadiün lan ában lúma Crístu, queísigubeirügü resíbi jumáali lan circuncisión lé meja jerésibirubei binádu jurúu lun jarúfuduni luágu lánigu jamá Búngiu. Circuncisión le jibíjubei, máma le adügúbei láu bíti luágu úgubu, jáni circuncisión, láu jasálbarun lídaangiñe figou le áubei jíabin ubouagun. Niján luwúyeribei ladúgüñíwa Crístu lun lánigu wamá Búngiu. ¹²Láu jabásterún, arúfuda jumúti luágu bunáwa jumá lúma Crístu lun ibágari le binádubei, sarátün gíñe lúma lun ibágari le iséribei ladúga jafíñerun luágu lubáfu Búngiu le ásaaragüdübalin lídaangiñe ouweni. ¹³Luágu meja ában dan, jiláñu jíña meja lun cátei lánina Búngiu ladúga jifígoun, ladúga gíñe jabágariduña lan queísi gürígia bouguditiña lueí lilúrudun Búngiu, agúnfulireina lúma sun luríban layúmajan júra. Ánjeinti guetó, rújali Búngiu iséri ibágari jun úara lúma Crístu. ¹⁴Láu louñwen Crístu, ferúduna

láali Búngiu sun waffgoun, ába lagúmuchaguagüdüni Búngiu lilúrudun Moisés lúma buri sun gumádi le lánina lúrudu ligía le áubei mabáfu wamá lun wagúnfulirun, queígubeirügü jamúga dágua láni Búngiu lúrudu ligía luágu lugúruwan Crístu. ¹⁵Dan le loúnwenbei Crístu luágu gurúwa, gáñei lumúti Máfia lúma buri líbiri ubáfu wuríbatí, ába lúnabudagüdüniña ligíbugiñe guríriguaü, ába lanúgüniña quei adaürütíña lun.

Áluaja jumeí buri cátei le lánina siélu

¹⁶Úa la ni ában añawarijati jarítangun luágu buri arúfudajani lánina cátei le lúnbei jeígini o le lan lúnbei játuni lun jagúnfulirun lúma Búngiu, o luágu lán buri fédu le jarítaguagüle luágu iséri irúmu, lúma iséri játi, o luágu lan wéyu le eméraguagülei. ¹⁷Sún buri cátei le, lúntirügü lagúnfulirúniwa lúma darí meja liábin Crístu uboúagun, liyáwa rügüñein le lúnbei liábin, Crístu ligía linárünbei. ¹⁸Mígiraguagüda jumá júngua joun ja afámurubaña quei únabugutiña, ja ájuduragubaña joun ánjeligu, lun janúgüni jagáñirun jueí. Weíríti jadímurejan luágu nege buri cátei le ayáwadaguti joun, ába buri janáangun joúngua luágu ligáburi jasáminan, le jáni gürígia. ¹⁹Mámañanu lídan ában lúma Crístu, le ichúgüdinai joun sun lánigu ja gíribaña lúgubu, le ágüdajabalin úgubu ligía, le awáanseragüdübadiwa lídan cátei le lánina Búngiu, ru ligía ubáfu woun lun gayáraabei lan lídan wamá ában queísi labúseeruni Búngiu. ²⁰Jugúya, ígira jumáli binádu jigáburi, queísi lídaanjadün lan ában lúma Crístu, gidáadün lídaangiñe ligáburi jarítangun gürígia luágu buri cátei. ¿Cáti uágu jabágaridunbei camá jamuga lánigugidün uboú, ²¹íchaagua júngua lun ligáburi uboú lun jagúnfulirun lúma Búngiu quei buri jamúga lúrudu le aríñagubei. “Magúurabeí le, meígabeí líra, máriügüdaabei cátei ligía”? ²²Sún buri gumádi le, luáguti buri cátei le gagúmuchaditi láu layúsurun, áni máma ámu cátei lueí gumádi buri lúma arúfudajani le jáni gürígia. ²³Inárüni luágu gayára lan genége láni buri cátei lánina subúdi lugúndun labúseerúniwa agúnfuliruni lúma únabuni lun lagúnfulirúniwa láu, áni deréti líra woun. Láu sun líra, mabáfuti lúrudu buri ligía lun lídejan luágu luríban jayúmajan gürígia.

3 ¹Queísiti jabágariduña lan ában ibágari iséri ladúga lídaanjadün lan ában lúma Crístu, áluaja jumeí buri cátei le lánina siélu, le ñí lubei Crístu ñun lueígiñe loúnwenren Búngiu. ²Samína jumá luágu buri cátei le lánina siélu, máma luágu buri le lánina uboú. ³Jilátün lúma Crístu lun uboú le, guetó, níjein jibágari le tímatimaati lúma Crístu le yágütabei siélu lúma Búngiu. ⁴Dánme lagíribudun Crístu, le úmabei lídan wamá ában, wachúlaaguba giñe lúma, ábame gafánran wamá lídan luweírigin.

Binádu ibágari lúma iséri ibágari

⁵Ígira jumeí sun le jigáburibei le láninabei uboú le. Úa la ni ában jídaangiñe agámariduti mamárieidunga, madúgün jugúyame cátei wíyeti, mafálara jumeí luríban ayúmajani, maweínamulá jágu luágu cátei le máma jáni, le

méme ájuduraguni joun sándu. ⁶Lueígiñe buri cátei le, láburujan lanárime ligáñi Búngiu jawágun ja madúgünbaña gásu láu. ⁷Jugúya, adúga buri jumúti meja cátei le lídan meja binádu jibágari, ⁸ánjeinti guetó, ígira jumeí sún buri cátei le. igáñi, iyéreejabuni, wuríbaní, anábajani, lúma buri dimúrei wíyeti. ⁹Maríñaga jumá iyéeni júmagua quei ígira jumáli lan binádu jigáburi lúma lé buri meja jadúgübei. ¹⁰Iséríjali jigáburi le isérideinábei quei méme ligáburi Búngiu guánarügü le adúgübalin, daríme jasúbudiruni Búngiu buídu buídu. ¹¹Iséri ibágari ligía, mámaali cátei lánina juríu jumá o máma jumá juríu, ni lánina jerésibiruni circuncisión lúma merésibirun jumáni, ni lánina teréncha jumá o máma jumá teréncha, machúlaaguntiña, idámuni, máma idámuni, Crístu, ligía sun cáteibei, áni níjein gíñe jádan sun lánigu láu láni Espíritu.

¹²Jínsiñetün lun Búngiu, anúadaja láadün lun lánigume. Ítara líña lubeíti, abágarida jumá queisi lánigu, láu gudémejabu, areíduni, manáanguni únguaü, gagáambadi, lúma gagúraasuni. ¹³Gagúraasun jumá jubáruagua, ferúdunagua jugúyame júmawagua, ítara quei ferúduna lánün Crístu, ítaralá gíñe jadúga. ¹⁴Lougiñe sun cátei, jínsiñejabu jumá, ligía cátei le íchugubalin sun cátei lídan ában, áni jóustagüdaleí lubuídun jigáburi. ¹⁵Abúguraleí lidárangilan Búngiu sun le jadúgübei, ladúga ligía lagúarunbei Búngiu jun lun ábanrügü jumá úgubu, abágarideína láu darángilaü. Geteíngiradi jumá gíñe.

¹⁶Buíngüdalouün láni Crístu ugánu janígi le gumúti. Arúfudaja jumá júmawagua, aríñagagua jugúyame júmawagua láu lichú áu. Jerémuja luágu luweírigun Búngiu láu eteíngiruni lun tídan janígi. ¹⁷Furúmieguaügü cátei le jadúga o le lan jaríñagun, adúga jumeí lídan ában luwúyeri le íchuguti inébesei lun Wabúreme Jesucrístu, eteíngireína Búngiu Úguchili lídaangiñe Jesucrístu.

Igáburi le lúnbei wagáburiduni jáma ja wábiñebaña

¹⁸Wüiríña, gagáambadi jumá joun júmarigu, ligía cátei buíti le lúnbei jadúgüni queisi affñetiña luágu Wabúreme Crístu. ¹⁹Wügúriña, jínsiñe jamá júmarigu jun, magáñida jumá jáma. ²⁰Isáanigu, agáamba jumáña jagúbüriгу lídan sun cátei, ladúga ligía jínsiñebei lun Búngiu. ²¹Agúbüriгу, másügüragualá jagúmadiruniña jisáanigu, ragú jáñein magúraasuni. ²²Esériwidutiña, gagáambadi jumá joun jiyúbudirigu lídan sun cátei, mámarügü dan le aríagu jáña lan jun lun jeréderun buídu jagíbugiñe, adúga jumeí súnwandan táu sun janígi ladúga luweírin linében Búngiu jun. ²³Furúmieguaügü cátei le jadúga, adúga jumeí láu ugúndani, camá jamuga jadúgüñein lun Wabúreme Crístu máma joun güri-gia. ²⁴Subúdi jumáli luágu líchugubei lan Búngiu alágan jun queisi jafáyeiruaja, ladúga lun Wabúreme Crístu le Jabúreme le tímatimaati jesériwida. ²⁵Ánjeinti le adúgüti wuríbati, lerésibirubei lafáyeiruaja wuríbati le ladúgübei, áni ában láu lanúgüniña Búngiu sun güri-gia.

4 ¹Iyúbudirigu, lúnti buídu lan jigáburi jáma jumúsuniña, ousera jumáña láu úarani lúma iríchaü, jarítagua jumá luágu níjein lan gíñe ában Jabúreme yágüta siélu.

²Ítara méme jumá ayúmuragua lun Búngiu sarágu, agáguduañu, eteíngireinei Búngiu. ³Ayúmuragua jumá gíñe wawágu lun ladáranun Búngiu béna wabá lun wapúrichijani ugánu le lánina asálbaruni lúma lun wasúbudiragüdüni laráansejan Búngiu le luáguti ñi lan Crístu jádan lánigu, juríu yebe, máma yebe juríu. Lueígiñe napúrichijani cátei le, nadaüríwa.

⁴Ayúmuragua jumá lun nasúbudiragüdüni furáangu quei lubúdubu.

⁵Buídulá jóuserun jáma ja mafínebaña, yúsu jumeí jidáani lídan cátei le buídubei. ⁶Lúnti gúndaawa lan láu jiyáanu súnwandan, lúnti gíñe semé lan, lúnti gíñe jasúbudiruni ída lúba lan jóunabuniña gürígia.

Lagúmujoún buri mábugaü

⁷Laríñaguba wadúje Tíquico nuágu jun. Jínsiñeti wügüri ligía woun sarágu, ligía ában ídejati buíti le gíñe esériwidubei lun Wabúreme Crístu núma. ⁸Ligía nóunajaanbalin jun lun laríñagun jun ída wáña lan, lun gíñe líchugun gurásu jun. ⁹Níngira gíñe Onésimo lúma, wadúje úraguati le jínsiñebeí woun, le jupaísanun. Jagíaba abájüdagua jun luágu sun le asúseredubei ya.

¹⁰Mábuga líña Aristárcu le nóuba furísunrugu jun, mábuga líña gíñe Márcos le lidúje Bernabé jun. Aríñawagúaaali jun luágu Márcos, ánjein núdün aríjaün, resíbi jumeí buídu. ¹¹Mábuga líña gíñe Jesús, le gíñe gíribei Jústó, jun. Jagía rügúñanu jádaangiñe juríu afíñetiña ja ñadágimeinjánabaña núma luágu larúeijan Búngiu, áni jayábin nun quei ában oúnwenbun dúgüdaguaü. ¹²Mábuga líña Epáfras le jupaísanun, le esériwidubei lun Crístu, jun. Ligía, súnwandan layúmuragun juágu lídan layúmuragun lun Búngiu lun derégüdagu jumá lídan jafíñen áni deréguñu júngua buídu buídu lun jadúgüni lugúndan Búngiu. ¹³Geféentina luágu jarítagua lan Epáfras juágu, lúma gíñe jawágu ja ubúrugubaña Laodicéa lúma Hierápolis. ¹⁴Mábuga líña Lúcas, le wasúrusian, le jínsiñebeí woun, jun, lúma gíñe Démas.

¹⁵Mábuga níña joun idújeñu lueígiñe Crístu ja ubúrugubaña Laodicéa. Rújuma gíñe mábugaü tun Nínfas lúma joun sunagun juágu lídan layúmuragun lun Búngiu lun derégüdagu jumá lídan jafíñen áni deréguñu júngua buídu buídu lun jadúgüni lugúndan Búngiu. afíñetiña ja oúndaragubaña túbiñe lun jájuduragun lun Búngiu. ¹⁶Lásunme jalíjanun gárada to júmagua, jóunajounme lun jalíjanun tílana ligílisi Laodicéa, alíija jumóunme gíñe gárada to achúlürüboun jun Laodicéagiñe to nabúrújaboun. ¹⁷Aríñaga jumá lun Arquípo lun ladúgüni wadágimanu le rúlaalíbei Wabúreme Crístu lun, buídu.

¹⁸Niján numábugaü le nabúrújabai jun láu nújabu guánarü—áu Páblo. Jarítagua jumá luágu nadaürúña lan. Binílaün Búngiu. Ítaralá.